

「國家社會科學基金重大項目」

何建明

主編

中國地方志
佛道教文獻匯纂

人物卷

(47)



國家圖書館出版社

【國家社會科學基金重大項目（11&ZD119）】

中國人民大學佛教與宗教學理論研究所

何建明 主編

中國地方志
佛道教文獻匯纂

人物卷

（47）

國家圖書館出版社

中國地方志佛道教文獻匯纂·人物卷
浙江省 衢州市

衢 州 府 志

清·楊廷望纂修

清康熙五十年（一七一—）修

光緒八年（一八八二）重刻本
府署藏版

衢州府志卷三十八

武進楊競如先生重修本 知府安陸劉國光重刊

方外傳

兩間磅礴靈淑之氣鍾爲英異實有不同於等夷者孔子不語神怪亦不欲學人舍正道而趨隱僻而非謂其必無之也然天人相接之理甚微而不易窺彼以已所不知而堅闢其爲烏有者亦夏蟲不可與語冰耳羽化步虛爛柯飛錫固有昭著人口耳者彼旣游於方之外吾亦存而不論可也若溺其說而攻乎異端則惑矣

西安

王質晉時人入山採樵見二童子對奕質置斧坐觀童子與質一物如棗核食之不饑局終童子指示之曰汝斧柯爛矣質歸鄉里已及百歲無復舊時人矣復入此山莫知所終遂名其山曰爛柯王貴質之弟今靖安鄉王貴峯有王貴寺

舒久視晉時人天福間修真冲舉因建清源觀卽太虛宮
兵火不存

陳應祥字知明政和間試修文輔教科授道至元素大夫

疑神殿校籍嘗詔爲高麗國教師尙書毛友以詩送之應
祥能詩手抄一十卷人傳其西興晚望一律復于太虛觀
側卓庵程公俱名以常清靜且銘之趙子晝爲書鄭公仲
熊跋

冲妙李先生未詳其蹟有趙公抃贈詩可知梗概詩見藝
文志

徐侍郎諱安貞嘗修真於本縣九峯巖巖高千丈無梯級
安貞飛步上下如履坦途

張柏亭皇明洪武季人玄妙觀都統永樂間奉勅建武當

山宮觀柏亭應 詔往玄天玉虛宮時遇異人授以葫蘆
桂枝各一嘗施藥授五雷秘法祈禱輒驗後還衢日跨青
牛出入白號葫蘆道人臨終預語徒眾曰我當某日某時
歸山果如言人皆以爲仙

慧通大師俗名徐氏法名志蒙婺人也好衣錦繡往來閩
閩間丐錢市猪首充饌因名猪頭和尚凡言災福皆驗景
德三年秋忽往三衢郡人遮道留之不可抵衢之吉祥院
浹旬需湯澡澣自述偈曰古貌昂藏法中之王猪頭干箇
不把片嘗陶具真性吾是定光端坐而逝越七日異香滿

室後寺罹火殿宇煨燼真體巋然獨存趙清獻公有贊
神力禪師姓周名利蹤澶之頓丘人入南泉室後抵衢之
馬蹊山結茅而居唐開成二年邑人翁氏於湖山創院今
有塔存焉舊有三取堂今不復見

南禪遇緣禪師吳季時人不知姓名號鐵腳

大徹禪師姓祝名惟寬唐貞元中行化閩越西安明果院
其適塲也憲宗嘗召見問法終葬潭陵西原賜諡大徹白
居易爲傳法堂記今明果寺有大徹禪師殿毛維瞻記
開明禪師姓許氏胥川人至三衢趺坐祠旁叢棘間十旬

鵲巢于頂敗葉沒膝適有郡守謁祠見師甚驚異時師年五十三始祝髮卓庵江郎山不出戶庭者三十八年有虎跑泉供飲

盧杜二禪師皆永嘉人咸平初至西安之玉泉鄉土人李鼎曰吾家西北有葉蓬山二師能留否許之且曰得雙鎮足矣鼎日使人資其糧問所欲五年不懈一日驚曰失問二師三日矣往視則瞑目据鋤相對坐逝

膠道者西安之原口山多猛獸阻險往來者沿崖攀木側足以行春夏水溢則病涉道者來居甘泉寺鑿山開道遇

虎狼則手撫去熙寧間以火自化其處今名塔山號金川聖者

通濟大師姓江忘其名建安人結茅於西安之烏石遂爲福應院以居焉自唐龍紀至雍熙累有褒表咸平二年始化

劉鐵磨比尼丘也奈子湖師曰汝莫是劉鐵磨否乎尼曰不敢師曰左轉右轉尼問和尚莫顛倒師便打後倒化

傑峰禪師西安人余姓諱世愚別號傑峰母毛氏妊夢觀世音送青衣童子覺而生師幼好禮佛建塔長入蘭溪顯

教寺從孤岳嵩公供洒掃旣而削髮爲僧遍歷名山銳志
禪奧刺血書典人咸器重之其行實詳載于宋公景濂慈
雲塔碑

無涯和尚皇明人族姓吳禮傑峰爲師明禪教博通陰陽
地理書永樂五年召赴京師授僧錄司右闕教賜金欄袈
裟

龍游

鄴去奢崇仙宮道士劉宋初隱于處之卯山一夕天神謂
曰石下有天諱佩劒終當歸汝去奢修煉至三年果得之

乃得道仙去

徐簡景靈宮道士修鍊於嚴之烏龍山既得道白月仙去
懶日勤溫之平陽人祝髮泛海舡過潮陽禮無有公精大
小乘歸經邑之靈山遂卓錫焉

趙緣督先生名友欽鄱陽人蓋宋宗室凡遁甲韜鈴天文
厯算之學靡不精究一日遊芝山酒肆中遇一丈人方曠
緣髮與飲酒盡出懷中冊書授之遂隱處海濱一十年註
易數萬言傳文懿公立極敬服之其書失于兵火存者惟
革象新書耳先生嘗乘青驪從以小蒼頭往來衢婺山水

間客中無所資而用未嘗乏倦游而休飄然坐化于龍游之雞鳴山宋公濂劉公基皆從先生遊華川王公禕手校其書以傳世書見藝文志

江山

慧海俗姓陳須江人往九江東林坐與岳侯飛善被逮宿逆旅中夜索筆作偈捕卒燭之已坐逝矣東林寺僧有夢之者趨視之則髮披肩爪甲寢長其顏如丹乃歸葬廬阜詹妙容本番陽人女唐貞元初來江山登真巖修鍊衣楮衣食草木實後騰雲而去

烟蘿子不知何代人修煉於烟蘿洞

南臺和尚持戒悟道偈曰南臺靜坐一爐香境界蕭然萬慮忘不是有心除妄想都緣無事可思量後端坐而化南安詩僧斷崖有戒行其徒孫也

非幻和尚寶陀庵住僧諳儒書精地理嘗應召相地天壽山錫以金紫永樂十八年遣使者祭其墓贈五官靈臺郎僧錄司右闡教

常山

女冠周德清元初人少于振塘洞石溪遇異人啖以蘿葡

遂不食烟火夜不假寢垂七十後尸解至正間賜號靖應
散人

金世萼常山球川人業醫好佛進香九華道遇呂仙予一
杖山行常先眾人後以年老力怯泣拜辭佛夜輒夢神語
曰吾當來少華就汝今付汝昆盧帽護持開山覓探諸懷
果得之歸遂請僧克先開山奉佛其中後卒之前一日同
里有二人皆夢其跨鶴而去少華山在常玉界故亦詳玉
山誌中

浮空不知何許人洪武庚子來傭南壁徐益家問其姓名

里居不答人因以浮空呼之嘗爲益董穫一日十餘處俱
有一浮空在焉浮空乃自酣睡寢室中餽食上源姻族計
百餘里不數刻輒往返一日謂徐氏曰君家在京師者有
大難禍將及君吾能爲君解之徐氏莫知所謂乃徐氏有
富戶在京師得罪將門誅及行刑會失富戶名遂得脫蓋
浮空篡取去云一日醉酒朗吟曰人間功行滿天上夢魂
高乃坐化徐氏具棺斂葬于東明山是夕大雨雷電颶風
啟棺尸脫不見遺屨一隻有跡深入石中益孫深爲作墓
僊石亭以紀其勝